

Cynulliad Partneriaeth Seneddol y DU a'r UE

12 Rhagfyr 2022

Mae Cynulliad Partneriaeth Seneddol y DU a'r UE yn gorff ffurfiol a sefydlwyd o dan Gytundeb Masnach a Chydweithredu'r DU a'r UE. Mae'n chwarae rhan bwysig o ran goruchwyllo gweithrediad y Cytundeb Masnach a Chydweithredu a holl gytundebau'r DU a'r UE yn y dyfodol.

Cynhaliwyd ail gyfarfod y Cynulliad Partneriaeth Seneddol yn Llundain ar 7-8 Tachwedd. Mae'r adroddiad hwn yn rhoi crynodeb o rôl Aelodau'r Senedd yn y Cynulliad Partneriaeth Seneddol a phrif drafodion y cyfarfod, ac yn nodi cynigion ar gyfer sut y gellid datblygu ymgysylltiad y Senedd â gwaith y Cynulliad Partneriaeth Seneddol yn y dyfodol.

Fe wnaeth Huw Irranca-Davies AS, Cadeirydd y Pwyllgor Deddfwriaeth, Cyfiawnder a'r Cyfansoddiad, a Luke Fletcher AS, aelod o Bwyllgor yr Economi, Masnach a Materion Gwledig, gymryd rhan yn yr ail gyfarfod, ac felly maent wedi derbyn yr adroddiad hwn yn y rhinwedd honno.



Cynnwys

1. Y Cynulliad Partneriaeth Seneddol.....	2
Rôl y Senedd	3
2. Yr ail gyfarfod	4
Gogledd Iwerddon	4
Gweithredu'r Cytundeb Masnach a Chydweithredu	5
Cydweithrediad ym maes ynni.....	6
Y berthynas yn y dyfodol.....	6
Hawliau dinasyddion, artistiaid teithiol a chydweithrediad diogelwch ac amddiffyn	7
3. Rôl y Senedd	9

1. Y Cynulliad Partneriaeth Seneddol

Mae'r Cytundeb Masnach a Chydweithredu rhwng y DU a'r UE yn darparu ar gyfer sefydlu Cynulliad Partneriaeth Seneddol y DU a'r UE fel rhan o'i strwythur llywodraethu. Bydd y strwythur llywodraethu hwn yn goruchwyllo'r Cytundeb Masnach a Chydweithredu a holl gytundebau'r DU a'r UE yn y dyfodol.

Mae'r Cytundeb Masnach a Chydweithredu'n darparu y dylai'r Cynulliad Partneriaeth Seneddol gynnwys aelodau o Senedd Ewrop a Senedd y DU. Mae gan y Cynulliad Partneriaeth Seneddol ran bwysig i'w chwarae o ran darparu trosolwg ar weithredu'r cytundeb.

Dyma'r unig gorff a all fynd ati ar y cyd i ddwyn Cyngor Partneriaeth y Cytundeb Masnach a Chydweithredu i gyfrif. Y Cyngor Partneriaeth yw'r corff sydd â chyfrifoldeb cyffredinol am y Cytundeb Masnach a Chydweithredu. Mae'n cynnwys cynrychiolwyr y Comisiwn Ewropeaidd a Gweinidogion Llywodraeth y DU.

O ran y Cynulliad Partneriaeth Seneddol:

- gall ofyn am wybodaeth am y Cytundeb Masnach a Chydweithredu a chytundebau rhwng y DU a'r UE yn y dyfodol gan y Cyngor Partneriaeth, a rhaid i'r corff hwnnw ddarparu'r wybodaeth;
- rhaid iddo gael gwybod am benderfyniadau ac argymhellion y Cyngor Partneriaeth; a
- gall wneud argymhellion i'r Cyngor Partneriaeth.

Mae'r Cynulliad Partneriaeth Seneddol hefyd wedi mabwysiadu ei rheolau gweithdrefnol ei hun ers ei sefydlu sy'n nodi sut y bydd yn gweithredu'n ymarferol.

Caiff y Cynulliad Partneriaeth Seneddol ei gadeirio ar y cyd gan gynrychiolwyr o Senedd y DU a Senedd Ewrop. Y cyd-gadeiryddion presennol yw Syr Oliver Heald AS a Natalie Loiseau ASE. Mae rhestr lawn o ddirprwyaethau seneddol y DU a'r UE ar gael ar eu gwefannau priodol.

Mae ffeithlun sy'n nodi ble mae'r Cynulliad Partneriaeth Seneddol fel rhan o'r fframwaith llywodraethu trosfwaol i'w weld yn y canllaw hwn gan Ymchwil y Senedd.

Rôl y Senedd

Nid yw'r Cytundeb Masnach a Chydweithredu yn darparu rôl ffurfiol ar gyfer deddfwrfeydd datganoledig y DU na rhanbarthau a dinasoedd yr UE na chymdeithas sifil? yng ngwaith y Cynulliad Partneriaeth Seneddol. Fodd bynnag, o ystyried y daw rhannau helaeth o'r Cytundeb Masnach a Chydweithredu o fewn meysydd cymhwysedd datganoledig neu'n cael effaith arnynt, mae'r rheolau gweithdrefnol a fabwysiadwyd gan seneddau'r DU a'r UE yn caniatáu i'r deddfwrfeydd datganoledig a sefydliadau eraill yr UE gael eu gwahodd i gyfarfodydd fel sylwedyddion.

Mae statws sylwedydd yn golygu nad oes gan gynrychiolwyr o'r deddfwrfeydd datganoledig hawliau siarad cyffredin yn ystod sesiynau'r Cyfarfod Llawn nac unrhyw hawliau pleidleisio.

Gwahoddwyd y Senedd i anfon dau o'i Haelodau i ddau gyfarfod cyntaf y Cynulliad Partneriaeth Seneddol. Mae Fforwm Cadeiryddion y Senedd wedi penderfynu, o ystyried eu cylchoedd gwaith priodol, y dylai'r Senedd gael ei chynrychioli gan Gadeirydd neu Aelod o'r Pwyllgor Deddfwriaeth, Cyfiawnder a'r Cyfansoddiad a Chadeirydd neu Aelod o Bwyllgor yr Economi, Masnach a Materion Gwledig.

2. Yr ail gyfarfod

Fe wnaeth gweithrediad y Cynulliad Partneriaeth Seneddol fel fforwm ystyrlon newid yn sylweddol yn ystod yr ail gyfarfod, a gynhaliwyd ar 7-8 Tachwedd 2022.

Roeddem yn gallu cymryd rhan lawn yn y trafodaethau pwysig a gynhaliwyd yn y sesiynau gweithgor a siarad yn ystod sesiwn y Cyfarfod Llawn am sut y gallai'r deddfwrfeydd datganoledig a chymdeithas sifil Ewropeaidd gymryd rhan yng ngwaith y Cynulliad Partneriaeth Seneddol.

Mae'r [agenda](#) yn darparu manylion llawn y siaradwyr a'r sesiynau. Mae [recordiadau o ffrwd we](#) trafodion y Cyfarfod Llawn dros y deuddydd ar gael hefyd.

Gogledd Iwerddon

Er bod Protocol Gogledd Iwerddon yn rhan o'r Cytundeb Ymadael ac nid y Cytundeb Masnach a Chydweithredu, mae'r angen i ddod o hyd i ateb wedi'i negodi i'r materion y mae Protocol Gogledd Iwerddon yn eu codi wedi dominyddu trafodaethau holl sesiynau'r Cynulliad Partneriaeth Seneddol. Roedd yn galonogol bod Aelodau Cynulliad Gogledd Iwerddon wedi gallu bod yn bresennol yn y cyfarfod i nodi drostynt eu hunain y materion sy'n wynebu Gogledd Iwerddon.

Fe wnaeth Is-lywydd y Comisiwn Ewropeaidd Šefčovič a Gweinidog Ewrop Llywodraeth y DU, Leo Doherty, roi diweddariad ar y trafodaethau parhaus i geisio datrys y materion sy'n ymwneud â'r Protocol. Fe wnaethant nodi bod naws adeiladol i'r trafodaethau. [Dywedodd](#) yr Is-Lywydd Šefčovič mai'r rheswm dros yr anghytundeb oedd 'gwiriadau bach iawn yn erbyn dim gwiriadau'. Galwodd am dynnu'n ôl y Bil Protocol Gogledd Iwerddon, sy'n mynd drwy Senedd y DU ar hyn o bryd. Gofynnodd i aelodau dirprwyaeth y DU gydnabod na fu'n hawdd i'r UE fwrw ymlaen â'r trafodaethau tra bod y Bil yn parhau i fynd drwy Senedd y DU.

[Dywedodd](#) y Gweinidog Doherty ei bod yn amlwg bod y Protocol wedi achosi 'problemau' economaidd a gwleidyddol yng Ngogledd Iwerddon ond bod Llywodraeth y DU wedi bod yn cynnal trafodaethau adeiladol gyda'r UE i ddod o hyd i ddatrysiad. Dywedodd y bydd Bil Protocol Gogledd Iwerddon yn parhau i

fynd drwy Senedd y DU ond na fydd yn cael ei gyflymu. Pwysleisiodd awydd Llywodraeth y DU i ddod o hyd i ganlyniad wedi'i negodi.

Mynegodd Aelodau'r ddwy ddirprwyaeth yr angen i ddod o hyd i ddatrysiadau pragmatig ac wedi'u negodi ar fyrder i'r materion sy'n ymwneud â'r Protocol, gan gynnwys yr angen i fynd i'r afael â'r diffyg democrataidd yng Ngogledd Iwerddon ac i gynnwys Aelodau Cynulliad Gogledd Iwerddon a'i dinasyddion yn y trafodaethau.

Gweithredu'r Cytundeb Masnach a Chydweithredu

Fe wnaeth y Cynulliad Partneriaeth Seneddol drafod materion cyffredinol ynghylch gweithredu'r Cytundeb Masnach a Chydweithredu. Nododd yr Aelodau sawl maes lle mae cefnogaeth ar gyfer cydweithredu dyfnach rhwng y DU a'r UE, gan gynnwys llawer o feysydd o ddiddordeb i'r Senedd. Mae'r rhain yn cynnwys cydweithredu ar ymchwil a datblygu, diogelwch ynni, newid hinsawdd a'r trawsnewidiad gwyrdd, symudedd myfyrwyr a phobl ifanc a chydabod cymwysterau proffesiynol.

Mae'r Gweinidog Doherty a'r Is-lywydd Šefčovič yn cytuno bod strwythurau llywodraethu'r Cytundeb Masnach a Chydweithredu'n gweithio'n dda ar y cyfan.

Nododd y Gweinidog Doherty feysydd lle mae cynnydd wedi'i wneud, fel ym maes ynni a chytundeb i gydnabod cymwysterau pensaernïaeth ar y ddwy ochr. Fodd bynnag, dywedodd hefyd fod Llywodraeth y DU yn credu bod angen 'cyflymu' y broses o weithredu rhai elfennau o'r Cytundeb Masnach a Chydweithredu. Yn benodol, hoffai Llywodraeth y DU weld cynnydd pellach ar gyfranogiad y DU yn rhaglenni cyllid yr UE, ar leihau rhwystrau i fusnesau'r DU i gofrestru ar gyfer TAW ar gyfer gwerthiannau ar-lein yn yr UE a thrawsyrru ynni.

Dywedodd yr Is-lywydd Šefčovič fod cynnydd yn cael ei wneud mewn llawer o feysydd fel pysgodfeydd a chymdeithas sifil. Fodd bynnag, dywedodd fod yr UE yn rhoi sylw manwl i sut mae'r DU yn cadw at ymrwymïadau tegwch yn y farchnad yn y Cytundeb Masnach a Chydweithredu. Ailadroddodd farn yr UE nad yw'r Cytundeb Masnach a Chydweithredu yn cymryd lle aelodaeth o Farchnad Sengl yr UE, ac na all fod ychwaith. Dywedodd fod y DU yn rhydd i ymwahanu oddi wrth yr UE ond y bydd hyn yn arwain at fwy o wrthdaro a chostau masnachu uwch.

Ailadroddodd yr Is-lywydd Šefčovič farn y Comisiwn Ewropeaidd bod cysylltiad sylfaenol rhwng gweithredu'r Cytundeb Masnach a Chydweithredu a gweithrediad llawn y DU o'r Cytundeb Ymadael, gan gynnwys Protocol Gogledd Iwerddon.

Cydweithrediad ym maes ynni

Mabwysiadodd y Cynulliad Partneriaeth Seneddol ei argymhelliad cyntaf i'r Cyngor Partneriaeth ar gydweithredu ym maes ynni. Mae'r argymhelliad yn dangos bwriad y Cynulliad Partneriaeth Seneddol i ddefnyddio'r pwerau a ddarparwyd iddo o dan y Cytundeb Masnach a Chydweithredu i ddwyn y Cyngor Partneriaeth i gyfrif.

Wrth wraidd yr argymhelliad mae cefnogaeth ddiwyro aelodau'r Cynulliad Partneriaeth Seneddol i Wcráin a'r angen i ymateb ar frys i'r argyfwng ynni a grëwyd gan ymosodiad Rwsia ar Wcráin.

Mae'r argymhelliad:

- Yn nodi'r angen hanfodol i'r UE a'r DU gydweithredu mor agos â phosibl i sicrhau cyflenwad diogel a gweithrediad effeithiol y farchnad ynni yn ystod gaeafau 2022-23 a 2023-24;
- Yn galw am adeiladu rhyng-gysylltyddion pellach rhwng y DU a'r UE;
- Yn galw ar y ddwy ochr i lunio datrysiadau pendant i sicrhau trefniadau masnachu trydan mwy effeithlon;
- Yn galw am gymorth ar gyfer prosiectau ar y cyd rhwng y DU a'r UE i hyrwyddo ynni adnewyddadwy ac, yn benodol, i fwrw ymlaen ag ymrwymïadau a wnaed i ddatblygu ynni adnewyddadwy ar y môr;
- Yn galw am fabwysïadu'r Memorandwm Cyd-ddealltwriaeth rhwng y DU a grŵp Cydweithrediad Ynni Môr y Gogledd cyn gynted â phosibl¹.

Roedd cefnogaeth i gydweithio pellach ym maes sicrwydd ynni, cydweithredu ar newid hinsawdd a'r trawsnewidiad i ynni adnewyddadwy yn amlwg yn nhrefodaethau'r Cyfarfod Llawn. Fe wnaeth Llywodraeth y DU, Comisiwn yr UE a chynrychiolwyr groesawu camau i lofnodi Memorandwm Cyd-ddealltwriaeth rhwng y DU a Grŵp Cydweithrediad Ynni Môr y Gogledd.

Y berthynas yn y dyfodol

Nododd aelodau'r Cynulliad Partneriaeth Seneddol sawl maes lle mae diddordeb cyffredin mewn cydweithredu pellach. Mae llawer o'r rhain mewn meysydd sydd o bwys i Gymru. Fodd bynnag, nododd holl siaradwyr y Cyfarfod Llawn fod angen

¹ Mae Grŵp Cydweithredu Ynni Môr y Gogledd yn dod ag wyth o Aelod-wladwriaethau'r UE â Norwy ynghyd i drafod datblygu ynni adnewyddadwy a gridiau ar y môr ym Môr y Gogledd.

ailadeiladu ymddiriedaeth rhwng y ddwy ochr cyn bod modd cynnal trafodaeth fanylach ar feysydd cydweithredu pellach.

Pwysleisiodd Llysgennad yr UE i'r DU ar y pryd, João Vale del Almeida, a'r Dirprwy Weinidog dros Faterion Ewropeaidd, Marek Havrda, a oedd yn cynrychioli Llywyddiaeth Gweriniaeth Tsiec ar yr UE, fod datrys y materion sy'n ymwneud â Phrotocol Gogledd Iwerddon a gweithredu'r holl gytundebau rhyngwladol rhwng yr Undeb Ewropeaidd yn llawn yn ofynnol cyn bod modd cydweithio'n ddyfnach ar feysydd eraill. Fodd bynnag, dywedodd y ddau, os gellir datrys y materion sy'n ymwneud â'r Protocol, yna mae cefnogaeth gan yr UE ar gyfer cydweithredu mewn nifer o feysydd.

Croesawodd nifer o siaradwyr gyfranogiad y DU yng nghynllun newydd y Gymuned Wleidyddol Ewropeaidd. Mae'r cynllun yn dod ag arweinwyr ynghyd o 44 o wledydd Ewropeaidd, gan gynnwys 27 Aelod-wladwriaeth yr UE, gwladwriaethau Gorllewin y Balcanau, y DU, gwladwriaethau EFTA, yr Wcráin, Georgia, Moldofa, Armenia, Azerbaijan a Thwrci.

Hawliau dinasyddion, artistiaid teithiol a chydweithrediad diogelwch ac amddiffyn

Roedd y materion hyn yn sail i drafodaethau mewn cyfres o weithgornau y buom yn cymryd rhan lawn ynddynt. Fe wnaethom ni godi materion a nodwyd gan waith Pwyllgorau'r Senedd. Yn benodol, y Pwyllgor Cydraddoldeb a Chyfiawnder Cymdeithasol a'r Pwyllgor Diwylliant, Cyfathrebu, y Gymraeg, Chwaraeon a Chysylltiadau Rhyngwladol.

Cytunodd pob un o'r gweithdai ar gyfres o gasgliadau a chanlyniadau y cytunodd aelodau'r Cynulliad Partneriaeth Seneddol fyddai'n cael eu rhannu gyda'r Cyngor Partneriaeth.

Canlyniadau hawliau dinasyddion:

-Ni ddylai fod unrhyw ostyngiad mewn hawliau i ddinasyddion, gan nodi'r diffyg democrataidd sy'n codi gydag angen penodol i ganolbwyntio ar ddinasyddion yng Ngogledd Iwerddon a'r heriau y maent yn eu hwynebu;

-Rydym yn nodi bod anawsterau'n parhau o ran gweithredu'r cynllun preswyllo'n sefydlog i ddinasyddion yr UE, gan gynnwys y nifer a'r ansicrwydd i'r rhai sydd â statws rhagsefydlog, ymgysylltu â'r broses ddigidol a'r diffyg tystiolaeth ffisegol o statws; ac rydym yn gwahodd y Cyngor Partneriaeth i roi ei ddadansoddiad ei hun o'r cynllun preswyllo'n sefydlog presennol.

-Nodi a chroesawu gwaith yr Awdurdod Monitro Annibynnol yn y DU; a chymharu hyn â'r diffyg cefnogaeth i sefydliadau sy'n eiriol dros ddinasyddion Prydeinig yn yr Aelod-wladwriaethau.

-Rydym yn nodi bod pobl o genedligrwydd gwahanol yn cael eu trin yn wahanol gan y DU wrth wneud cais am fisas gwaith, ac yn benodol, rydym yn gwahodd y Cyngor Partneriaeth i nodi a yw wedi ystyried cynllun symudedd yn y dyfodol ar gyfer pobl ifanc rhwng y DU a'r UE.

Artistiaid teithiol

- Mae diffyg cytundeb ynghylch artistiaid teithiol yn y Cytundeb Masnach a Chydweithredu yn creu problemau, yn enwedig i artistiaid ifanc a newydd;

-Dylai'r Cyngor Partneriaeth annog yr UE a'r DU i negodi cytundeb cynhwysfawr i ganiatáu i artistiaid deithio'n rhydd yn yr UE a'r DU;

-Yn y cyfamser, dylai'r Cyngor Partneriaeth edrych ar y camau y gellir eu cymryd nawr i leihau'r beichiau y mae'r rheolau presennol yn eu creu.

Cydweithrediad ar amddiffyn a diogelwch

- Gydag ymosodiad Rwsia ar Wcráin yn rhoi rhybudd mawr ym maes diogelwch, sut y bydd y DU a'r UE yn ystyried sut mae angen i'w perthynas a'u cydweithrediad esblygu i ystyried hyn a sicrhau bod Wcráin yn cael y cymorth sydd ei angen arni?

-Dylid cynnal deialog systematig fwy rheolaidd ar faterion o ddiddordeb strategol i'r DU a'r UE, a gwahodd y Cyngor Partneriaeth i ystyried sut y gellid cyflawni hyn, er enghraifft cymryd Pwyllgor Masnach a Thechnoleg yr UE/UDA fel templed a'i ymestyn i fformat teirochrol gyda'r DU;

Y camau ymarferol y gall y DU a'r UE eu cymryd o dan y Cytundeb Masnach a Chydweithredu i wella deialog a chydweithrediad gweithredol yn erbyn bygythiadau hybrid eang, yn enwedig seiberdroseddu, er enghraifft drwy gyfranogiad y DU mewn prosiectau PESCO perthnasol.

3. Rôl y Senedd

Roedd ymgysylltiad aelodau'r deddfwrfeydd datganoledig yn nhrefodion yr ail gyfarfod hwn o'r Cynulliad Partneriaeth Seneddol yn llawer gwell. Mae angen gwneud gwaith nawr i ymgorffori'r dulliau gweithredu hyn mewn cyfarfodydd yn y dyfodol a gwneud y gorau o'r cyfleoedd ymgysylltu a chraffu y mae hyn yn eu cynnig i'r Senedd.

Nid yw Aelodau o'r Senedd yn aelodau llawn o ddirprwyaeth y DU ar hyn o bryd. Nid oes gennym hawliau siarad ffurfiol yn ystod sesiynau'r Cyfarfod Llawn ac nid oes gennym unrhyw hawliau pleidleisio.

Fodd bynnag, roeddem yn gallu cymryd rhan lawn yn y trafodaethau gweithgor yn ystod yr ail gyfarfod, ac roedd sesiwn y Cyfarfod Llawn yn cynnwys eitem agenda ffurfiol ar ymgysylltiad y deddfwrfeydd datganoledig a chymdeithas sifil Ewropeaidd yng ngwaith y Cynulliad Partneriaeth Seneddol.

Yn ystod yr eitem hon ar yr agenda, fe wnaethom ni nodi pwysigrwydd y Cytundeb Masnach a Chydweithredu i Gymru, y cyfrifoldebau sydd gan Lywodraeth Cymru a'r Senedd o ran ei roi ar waith mewn meysydd datganoledig a pha mor ddifrifol y mae'r Senedd wedi mynd i'r afael â'r dasg hon yn ystod y Chweched Senedd. Gwnaethom achos cadarnhaol dros gynnwys y deddfwrfeydd datganoledig yng ngwaith y Cynulliad Partneriaeth Seneddol.

Gyda'i gilydd, roedd y ddwy fenter hyn yn hynod o bwysig ar gyfer datblygu ymhellach y cydweithrediad rhwng y deddfwrfeydd datganoledig a'r Cynulliad Partneriaeth Seneddol. Rydym yn gobeithio y caiff y cynnydd hwn ei gadarnhau mewn sesiynau yn y dyfodol a'i raglen waith wrth iddi ddatblygu.

Er bod y datblygiadau hyn i'w croesawu, gellid gwneud mwy o waith i ymgorffori cyfraniad y deddfwrfeydd datganoledig a sefydliadau eraill yr UE yng ngwaith y Cynulliad Partneriaeth Seneddol ac ymgysylltu'n well â rhanddeiliaid o Gymru yn rôl y Senedd.

Rydym yn gobeithio bod y gwaith o lunio'r adroddiad hwn yn ddechrau ymgysylltu pellach rhwng y Cynulliad Partneriaeth Seneddol a busnes a

phwyllgorau'r Senedd. Rydym yn gobeithio y bydd rhannu'r crynodeb trafodion hwn, yn ogystal â helpu i graffu ar lywodraethau a gweithredu'r Cytundeb Masnach a Chydweithredu, hefyd yn annog Aelodau'r Senedd a phwyllgorau i wneud y mwyaf o'r cyfleoedd ar gyfer ymgysylltu rhwng y Senedd ac aelodau'r Cynulliad Partneriaeth Seneddol.

Mae wedi bod yn anoddach i sefydliadau cymdeithas sifil Cymru gael cyfleoedd i ymgysylltu a chydweithio â chyrff cyfatebol Ewropeaidd ers Brexit. Rydym yn gobeithio datblygu ymgysylltiad gwell â rhanddeiliaid Cymru ar waith y Cynulliad Partneriaeth Seneddol.

Mae'n bosibl y bydd datblygiadau diweddar, fel y Dystysgrif Perfformiad Ynni a themâu a ddeilliodd o ail gyfarfod y Cynulliad Partneriaeth Seneddol, yn cyfiawnhau ystyried sesiwn graffu ar y cyd o bwylgorau'r Senedd sy'n gweithio ar faterion y DU a'r UE gyda Gweinidog y DU. Gellid hefyd ystyried ymgysylltu ar y cyd â sefydliadau'r UE.

Yn benodol, er mwyn datblygu'r berthynas rhwng y Senedd a'r Cynulliad Partneriaeth Seneddol ymhellach, rydym yn argymhell:

- 1.** Bod y gwelliannau a wnaed i gyfranogiad y deddfwrfeydd datganoledig yng nghyfarfodydd ffurfiol y Cynulliad Partneriaeth Seneddol bellach yn cael eu gwreiddio fel arfer gwaith cyffredin;
- 2.** Bod ystyriaeth yn parhau i gael ei rhoi gan Swyddfa'r Cynulliad Partneriaeth Seneddol i'r deddfwrfeydd datganoledig allu gymryd rhan yn nhrefodaethau'r Cyfarfod Llawn ar feysydd cymhwysedd datganoledig;
- 3.** Bod cynrychiolwyr y Senedd a phwyllgorau perthnasol y Senedd yn cydweithio i ddatblygu perthynas anffurfiol ag aelodau dirprwyaethau y DU a'r UE y tu allan i gyfarfodydd ffurfiol y Cynulliad Partneriaeth Seneddol ar feysydd o ddiddordeb cyffredin;
- 4.** Bod adroddiadau ar ganlyniadau sesiynau'n cael eu rhannu fel mater o drefn a'u dwyn at sylw pwyllgorau perthnasol y Senedd a Llywodraeth Cymru.
- 5.** Bod mecanweithiau'n cael eu datblygu i ymgysylltu â chymdeithas sifil Cymru ar waith y Senedd ar y Cynulliad Partneriaeth Seneddol - a hynny cyn y cyfarfodydd ffurfiol i lywio'r cyfraniadau a wneir gan aelodau'r Senedd ac ar ôl cyfarfodydd i roi adborth ar drafodion a'r ymatebion a gafwyd i faterion blaenoriaeth.